

四庫全書

集部

欽定四庫全書

滄溟集卷二十三

明 李攀龍 撰

墓誌

明故封太安人許氏墓誌銘

太安人者許氏瓊之長女也其先鳳陽人徙長興四世而母方氏生太安人太安人生十歲受劉向列女傳觀古圖畫問知大義遂善繪事其工無二見者謂吳興管夫人以來所未有也嘗曰刺繡制形圖畫制意形致欲

實意致欲虛並伎相發若輟若起父益竒之年二十得
承德君馬蓋贅壻也猶若不欲遂適之承德君故儒俠
好客日椎解不視生產太安人又為父言大人幸以兒
承事徐君即里中豪不敢藉我家雖日椎解好客即所
授室弟子與里中豪獻牛酒為旦夕費未嘗假許氏一
錢徐君丈夫也久之承德君游日益盛生產日益微太
安人乃日操作供具以為常至鬻所圖畫佐緩急而承
德君不知其所繇置矣汝寧君於承德君為季子昵不

令就外傳稍長猶自授章句即情弗忍問也太安人顧
譙讓不少貸汝寧君亦父事太安人每夜呻佔則太安
人以機杼相濟膏稱寢汝寧君嘗言比呻佔時聲嘗若
從機杼中出者汝寧君既舉進士除刑部主事以甲寅
封承德君及太安人尋行論淮上丙辰遷郎中充江南
治獄使者出便道兩詣太安人問所平反活幾何人必
論誦其爰書狀如目前俯聽仰思各務有一二語自當
而後已以自快也汝寧君既再補郡太安人乃從長興

來亡何謂曰我先不至汀州今至汝寧矣誠以郡大守古二千石祿甚厚自吾為汝家婦魚菽纔自給恐居非命所當託即不任饗徒以疾為爾憂若猶是齋厨蕭然在官與在家同也由是為汝寧者數月而太安人必聞其政以莫不曰循吏云屬內考汝寧君有所中當左遷解郡歸遂循不欲行者二年太安人乃曰吾老啖粥耳汝家故有田一壥茗水上何至使王長君兄弟遺百金裝署曰太安人甘脆之費乎受之何辭也凡以痛若輩

落拓不偶忤俗蒙謗無以洒之若將挽馬傾身為之也
范孟博何人哉方今天子聖明正臣當國不乘時白見
寃狀而勉圖功名以自効何以間執慝口令謂無所復
之汝寧君乃行至京師六日改長蘆轉運判官居三月
移瑞州府同知且以補郡而太安人訃至矣嘉靖四十
四年九月二十有一日也距生弘治元年十月五日年
七十有八歲某年月日汝寧君以祔承德君之壻顧渚
山下承德君名東有大節能持論與其家世戚屬並見

宗考功臣誌中汝寧君名中行考功誌稱汀州君誌曰古賢母性自有之乎抑因其子以立名迹矣汝寧君再出治獄多所平反然其大者已不得如雋曼倩之用春秋斷詔獄兩至二千石皆數月罷去其次者又不得非期自表效崔子真之在五原是可曰吾有經術家世儒者哉太安人誠以二母自視而計是乎范母教子屬方捕逮乃曰吾兒得與李杜齊名亦復何恨語雖怨而不怒然一何決也太安人所云乘時自見寃狀勉圖功名

若曰善惡在我何與於彼云爾又何辭氣繾綣不忘以望子者望之君父慈而知禮性自有之矣是為銘銘曰
豈維夫是躬亦維予是相豈維予是荷亦維予是儀豈
維勞斯厚生困斯令名亦維逸斯敗營捷斯躋成何有
何亡義乃服屢進屢退道乃復卓彼明淑於焉貽穀

明故封孺人賈母魏氏墓誌銘

余為郎蓋與孺人仲子衡同舍故得聞孺人孺人生十
歲處士君於御史君有貺命矣逾年而孺人不幸瞽處

士君且將篚采返焉御史君為父封君言彼初固願有
家也封君諱瓚孺人卒歸御史君日從容請御史君置
妾御史君又固不可時戶部君為御史君兄方置妾京
師孺人則復力請御史君復固不可也御史君在武皇
帝時九江盜起身攬轡往破之乾清宮灾奉詔言退小
人數事守北地又忤武皇帝中貴人而車駕遂不幸北
地語在呂太史栴誌中孺人一處士女又瞽卒使固不
置妾是自孺人賢矣太子少保工部尚書俊孺人王舅

也謂御史君古人所難復歎魏家兒稱為御史君婦也知
言哉孺人雖自贖贖病乎御史君携家人宦游數千里外
垂上十載非孺人安得無廼內顧也守準言孺人自鍾美
御史君使慮攝一家事諸僕若婢日獻功孺人前如孺人
指嚮往無不當御史君意即僕若婢或不告孺人行不當
御史君意孺人復為譙責是非如見也御史君疾且革屬
衡孺人曰是兒弱冠成名矣索筆卧中書進士字簡上授
守準守準二十歲果偕計游京師凡五上卒為進士除主

事比部舍中先是孺人夢受金鑪置笥中也寤而生守準
蓋夙昔私竒之矣守準每下第來孺人為曰即金鑪事不
兆可忘而父所授簡上書予嘉靖丁未就養京師又謂守
準今而後汝母可持而所授而父簡上書往地下無憾也日
數為守準道御史君進士時一蒼頭扶鹿盧牀前持騎過故
人官長身出刺褒中俸錢嗛不飲酒肉客來僦舍內共持
一案飲食朝退即讀書終日坐何至如今出入列騎從大策
翳道來呵胠篋吏次且顯者門無歲時賀謁轉相主進為姓

名尺籍上使者持之無不如左券家索醵金高會無訛
羸稱貸與之如携取日交錯戶外為闢者病也銘曰嗚
呼孺人匪德爾娛而家愉愉哉匪嗣爾須而宗訐訐哉

明孟宜人墓誌銘

余蓋自弱冠與許殿卿游狎知孟宜人賢宜人適殿卿
七日而封君亡矣比殿卿在郡諸生中又數不第乃宜
人力貧支憊其荼習菟備所不堪一無難色退言也殿
卿嘗卒業城南山中太宜人念之泣不能寐宜人勞之

曰太宜人幸就寢矣夜如何其無乃孟母據機時邪彼方念子自苦也屬長君復啼於襁間索殿卿甚急宜人給之曰而父且至為而懷果飽啖汝何啼也且勞且給達旦矣一日大匱太宜人中爨不能飯宜人乃指一空筐出易粟上食太宜人如常食間宜人嘗在蓐太宜人躬為糜至蓐所哺之未竟而淚下出語人曰安有在蓐而日徒糜者宜人聞之愴然為蓐中襦結託市數卵以為隣媪遺也其所曲事太宜人者類如此殿卿為諸生

不能具衿鞞率宜人染緝䟽縲成之不辯其非衣帛而
曳革也殿卿守趙州有裝橐將寘而去者宜人問焉曰
某家金用為壽耳因叱之曰奴速負去斷頭矣其御僕
從素謹嚴犯無不笞掠於庭者蓋憚於殿卿焉後裝橐
家伏臯余實在邢州屬郡推官邾李君聽其獄廩廩於
宜人矣無何殿卿調貴州之永寧萬里太宜人宜人為
若朝夕殿卿在側者殿卿得以遷德王府右長史歸凡
三歲太宜人乃卒母子相存宜人力也殿卿長史德王

府勘中官某氏子弟又有裝索將寘而勿逸者珠珥直千金矣宜人遽曰安用此糞土加諸首豈以為有廉吏未必有廉婦乎德王府雖里閭萬里矣後殿卿市一珥示宜人宜人曰此大類某氏物何從致之哉然治家人生產其稍入皆手自簿計緡筭衡量焉太宜人每取卮酒餉令立盡之矣癸亥殿卿補周王府長史以宜人從明年宜人還濟南尚猶時時傳救諸婢妾不絕即諸婢妾無不人人若宜人在邸中也還濟南者三年封宜人

封宜人若干月而卒隆慶戊辰七月三十日也距生正
德某年月日凡五十有八歲云子男一人即復郡諸生
娶德府儀衛副薛來女女二人一適進士于鯨一適邑
諸生李應聘孫男二人宗周娶保定府知府陳朝孫女
朝周末聘女五人一適太學生史本子史某一適前進
士宜興縣知縣谷繼宗孫谷某餘未聘殿卿名邦才周
府左長史階朝列大夫宜人郡之德平人父名某母某
氏卜某年月日葬于某山祖兆云誌曰余蓋自弱冠與

殿卿游狎知孟宜人賢矣奈何宜人之於里閭見謂自
健也夫自健之譽實近於悍奈何里閭之於宜人見謂
自健也夫力貧支憊其荼習蓼備所不堪一無難色退
言宜人信自健困於捐篋翦結而不變于裝橐千金即
不變於裝橐千金而家人稍入簿計緡筭百不失一宜
人信自健憚於殿卿諸婢妾人人如在其邸中者宜人
信自健然而太宜人臨新婦亦已莊矣至哺糜尊所而
卮酒餉之殿卿禮宜人如賓及其館于甥於髡髻而脫

然無疑於愛子又何可謂自健也大誼章章而譽近於
悍又奈里閤何殿卿自狀宜人扼腕於蘇季子朱買臣
之取絕於其妻也德宜人深矣然自二子之妻無似耳
安有匍匐乞憐後車命載而能糞土千金叱裝索唯恐
其污已哉何以有功于廉吏也不知其婦視其夫矣何
里閤之未有以槩于殿卿哉語曰弓強于彌衣韌于裏
此殿卿之所由腹悲也是為銘銘曰欲婦是圖視其姑
欲妻是孚視其夫大誼用章此焉攸箴

墓表

徐給事中墓表

公諱易字希文舉嘉靖甲辰進士明年授鄞縣令先是縣以饑饉餓莩載道公至輒大發賑起者萬計夏大旱用壁天井山龍見于雩雨踵公至邑遂以有秋乙巳復大旱乃再雩而雨邑每火公不憚鬱攸出必直風風以反其氣相感動類如此蓋治賦則具有參伍無產厚薄無不如手劑其橐中民至今無不均之患聞萬金湖若

千頃築堰東西鄉凡三十二所瀦洩唯時邑至今賴之
嘗乘城見齒豁赫然在陴下輒屬吏某所樹所為棺塋
焉而後去詰朝冢纍纍數十出其地上矣不必盡見其
齒豁赫然也繇是旁邑之民來歸者蓋數千戶居則募
兵教水戰大儲餉以養其年或以淵藪逋逃諫阻之弗
聽也亡何而海寇作矣人始服其前識云日聽獄常數
十牒獄無留繫庭無暴卒歲厲疫則出因尅期入逮若
固在焉性敏捷一經目即更數年不忘以故人不能欺

然亦不以欺人其視百姓之害去之如仇讐視蔽政如
匪斲衣之於體蓋三年人無能犯其守者屬歲歎邑中
豪家競相勸輸矣莫不曰庶幾有事效公上乎郡報檄
下則自取其償又若謂不敢以小民微勞之使神明令
有宿義公卒聽之亦謂不敢以其守妨賙恤之美俗云
久之徵為戶科給事中凡三月而卒於官父某子克敬
世廣信之永豐人鄞人薛晨時為郡諸生嘗館於其署
所次狀如此余曰萬家之邑精物亦大矣凡以令身自

出之也雩而雨火而反風者天邪歲一歎家相勸効急
公上而後食人不自知其使之開萬金湖貽數百年之
利流澤無已時即後之君子不以其居常募兵教水戰
為迂而益為斥守倭安能輒傳城下也鄞之政備矣以
給事中何加馮三月而卒于官美先盡矣乎然未有為
令臣而遺力讓賢者也才不持數者哉

劉處士墓表

處士名紹箕其先崇陽之南谷人五世祖曰榮四者始

亡命宜春榮四生祖才復如崇陽居祖才生仲文仲文
生宜黃生吉吉生鐸處士其第五子也處士諸兄皆用
訾為縣功曹處士日趨縣諸兄裝齋之矣嘗為伯護家
宦游蜀中乃歸不持蜀中一錢而謂伯彼且謂紹箕廉
吏弟誦義豈有窮時何更為治裝中金令越境盡也即
令不與伯俱而往他所緩急又誰恃乎處士嘗侍疾父
鐸所父鐸所非處士侍不說也父患苦噎不能喘息飲
食下輒出不留其在診籍中諸醫藥試多不驗者處士

則從人受禁方截玄猿啖之病旋已也崇陽故無猿乃處士走索猿自禱三日不得猿剖膚進矣即三日得猿南谷去縣中可十里所處士嘗夜為父往謁醫道遇雨河漲即馮河水且減頂至乃大木從上流來處士卒用濟河矣母李且衰恃鬻耳一歲中往來諸子家率不再三過獨謂處士乃數見愈益鮮使母嗜食不為愛兒所不恤久恩兒為也處士為人在儒俠之間里中少年多時時竊藉其名以行某欲攘其隣善田即偽為隣人券

而行錢處士家願得季布一諾處士怫然曰汝不亦豪
乃以我為即令我署名其間我遂直汝哉其先胼胝闢
草萊且溉且糞沾沾曰甌窶拓之不餘穡力積勞至膏
沃旅亞序錢鏄計侯出俶載如趨仕官所翹首望納稼
期不啻欲握苗起婦子時時行饁田畔往來見土壤愉
悅無不視若綺錦惜若肌脊俛有拾仰有取自穰世世
勿離農畝也一旦挾偽券數其齒責收之當令彼負其
耒耜安從適乎先是姬某亦有田十畝所屬豪亦欲辟

睨有之及知處士所急者此嫗也無取也乃嫗則持券
來遺處士又謝不受矣處士夙昔好堪輿家向從蜀中
來唯一相冢書肘後爾蓋自食伎術行道間千里傳精
實不持一錢處士取胡母生子縉女為程伯驥妻縉子
景韶與余同進士余為郎復與同舍比部中自言已三
男子矣余謂處士無論與里閭浮沈即能趣人之急而
脫於阨若排難解紛各厭其意使邑中豪相高矣匹婦
賂遺不忍以其身為溝壑恐彼以我為非人也得父母

金史卷之三十三
卷二十三
而事與不得於父母孰媮快哉

神道碑

明封文林郎山東道監察御史馬公神道碑

公諱瓏字聲甫其先真定人元有浙江行省平章政事者家錢塘今葛嶺相傳馬平章遺址者其故第也平章生庸守泉州路卒葬西湖即智果寺東墓也庸生林紹興路通判成浙江行省斷事國初改理問始徙湖州之德清成生震震生禎禎生恒恒生六子最少景暹配姚

氏生二子次即公公復徙仁和籍焉蓋馬氏中衰矣先是公在德清困於徭賦而千金殆盡乃鄉里少年益侮之公謂吾寧雄於都會自見耳德清豪易與也暨公兄以臬曹掾滿歸邑公則屬產於兄脫身徙仁和太孺人外家雖仁和然公自以大丈夫能廢千金之產能致千金之產者也使籍先業而息之豈其雍容哉手足之謂何而又孀兄以為利即依外家何必去德清無何通政君學乃大起公輒不復厚治生顧聘享經師內交諸友

行修將幣一聽通政君所為羔雁玄纁無不腆焉其自奉苟無匱而已嘉靖丁未通政君舉進士選庶吉士則迎公太孺人京師己酉授御史出按山東則以公歸癸丑公封御史甲寅通政君復迎公太孺人京師戊午遷太僕少卿尋改令官庚申復迎公太孺人南都秋八月太孺人卒復以公歸公歸之日不復有心於世矣謂通政君曰吾再詣京師望宮闕陵寢如在天上以爾韋布之微褻然子大夫後為王吉士讀書玉堂之署著作館

閣既而冠柱後立西臺持天下風裁攬轡海岱以臨真
定得以案章言百姓疾苦激揚部刺史以下郡邑吏命
曰正色抗疏之臣三輔之役譽髦如林俎豆邦畿稱文
校藝以慰樂育之心思服自近始一何雄也以吾擁乎
爾而再詣京師躬饗其盛何必自其身致之始爾為我
約四方諸長者朝夕與游及再詣京師其子各以出補
若罷去一時諸長者視昔不能十之三又何論未若爾
之有顯庸尋以卿貳待年南都用儲大體國家之寵靈

爾者吾所豈欲但金陵之勝哉始吾為爾行修將幣羔
雁玄纁唯腆里閨少年方姍笑我實謂爾於今日有不
可知者耳自爾有今日吾豈忘之哉凡七年而公卒丁
卯三月二十七日也年七十有八歲公配即張太孺人
二子長即通政君三才娶賈氏封孺人次三綱太學生
娶陳氏繼娶張氏女一早卒孫男三曰應華亦太學生
娶禮部尚書高公儀女曰應策殤通政君出曰者孫三
綱出也孫女四通政君出者適諸生許三經官生高循

學三綱出者適諸生沈渭徐守圭曾孫女一曰鳳娥公
事兄既謹女兄胡少恤公孤公尤德之及通政君貴命
之曰頊爾事伯猶父事姑猶母也初公之伯景昌者以
進士為大理評事謂公曰是當後我評事公沒而族人
訟焉公不為後也族人爭分其財公獨載其主而時祀
之以為常公為次壻于張其長女贅者輒背去公代為
養而卒葬之其厚倫理篤恩義出於天性類如此至其
足不踏公府口不譚貨利負悼俗之懷抱拯物之具而

有不必施焉君子難之矣表曰今之君子不階先業動廢千金焦勞中興自奉菲劣腆於修幣課子起家歷厥華要以守卿貳此方其三命而於車上儻時也不挾郡邑大夫謬恭以為尊重而間執少年姍笑者即計田宅明積著作為焦勞菲劣得志而為之何所不至矣又不然悼俗之懷與極物之具為郡邑大夫上便宜言行事如蓋公葦郡邑大夫將請燕閒而不可得躬致千金子孫息之孰大卿貳乘此不權坐失觀變之術今之君子

吾見亦罕矣而足不蹈公府口不譚貨利乎三游兩都
躬饗其盛為名高耳今之君子其矯者以小嫌為解而
辭不就不謂可以肺腑相示卒令其子不得承驩顏安
其職於外如此又安能不復有心於世哉有子而有心
於世有子而不復有心於世出處之大誼乎銘曰平章
之曹聞人代興臬曹避役而公是膺脫身更造載遷武
林不階先業積著千金有子納言兆光潛德踐華據要
激揚淑慝三游二京締延長者杖屨衣冠遙集闕下寵

靈王國諸父攸同行修將幣伊孰之功旋息里閑世相
與忘䟽曠自引曰恬是常過響賜命絕跡偃室蹈則倫
理譚則經術悼俗斯深拯物孔備燕翼用成奚其躬致
以貽有穀亦庶敦仁於焉起家卿貳之臣昔在屬吏忝
茲大藩采風故老樹茲九原

行狀

亡妻徐恭人狀

亡妻恭人徐公宣之仲女徐公家本藩國列校微也嘉

靖歲庚寅以適余衿縞不具明年余補郡諸生有宅一
區太恭人逋遷而翦其餘以糊口者三盡則杯捲孰合
細靡錠拊鬻諸市朝售馬糞夕售馬糞無常飽矣恭人
佐太恭人賃縫井臼宴然箕帚不滿隅蔭一壁煬一竈
歷寒暑者數年無躁容丁酉余既廩諸生間恭人嗾嗾
猶若不能適晦朔所授弟子束修以上上太恭人雖徹
必劑以復進始余與廬州別駕郭君為諸生同筆研嘗
過余而止之飯恭人坐簾以爨也前肅惟謹郭君察之

假擔薪庚子余舉於鄉明年置妾蔡甲辰第進士恭人
隨侍太恭人京邸明年疾予告隨侍太恭人歸濟南丙
午起家復隨侍太恭人京邸丁未授刑部主事三年封
安人尋陞負外郎明年遷郎中明年復隨侍太恭人歸
濟南癸丑出為順德府知府恭人自濟南隨侍太恭人
之郡余丙辰上績得封恭人尋擢陝西按察司提學副
使戊午復疾投劾歸濟南則恭人再擁新婦侍太恭人
矣越在田間凡十年隆慶改元聖天子覃恩遺佚諫議

之臣交章大薦海內二十有二人與焉而余以一執臬
吏自惟不佞方願與恭人終俱隱之誼乃七月二十四
日卒於正寢嗚呼敬狀之長者哉恭人生五十四年乎
人撲耳太恭人雖莊臨之然年已七十有二恭人猶尚
踉蹌若失太恭人意蕙蕙然自訟本辟之而反及之命
邪性溺愛必躬視子之飯必飯子而後食即食必祝艾
家姑舉火乎益白首响哺不恤其子之近若饜而益勸
不知其不敢為養乃五十輒自老雖狎必闔門與余語

妾輩言事必直致其辭不敢以諷然後應一與之嫌終身督過不少假云嗚呼妻欲惠乎惠斯惠御之孰與置人樸於室之相忘也孟德曜綺縞粉墨嘗試梁鴻以觀其志七日不荅乃出椎布於懷中何其惠也然作使伯鸞偃蹇已甚鴻何能相忘於此即舉案莫敢仰視猶之儀耳恭人豈獨為勝邪無乃默默低頭就之乎蓋德曜有憂患之心矣恭人子二人曰駒郡諸生先娶曹氏女繼娶山西應州知州馬應奎氏女曰采女一人適歲貢生

艾濟氏子芹又子一人曰馴妾盧氏出也駒生子二一
曰鳳翔聘鄉進士于鯨氏女一曰鹿齡未聘女一許邑
諸生王見賓子衡外孫一人曰維高采與鳳翔先後殤
卜是年十月四日葬郡城西北馬鞍山之東陽祖兆南
若干步

祭文

祭三原王公文

嗚呼不天下以仁而孰與為大臣不天下以度而孰與

為大人方公之守維揚也饑饉薦臻溝壑斯民爰發廩
庾不俟報章恫瘝者身蓋已汲長孺之倫以及拊循東
南大水凶歲衆望翕然庶蠲賦稅公乃獨持其義而軍
國是計陰以免者十數郡而不億其麗乃闢三塘勻陂
與繼川不為沴是乃仁術遵周之制矣又公之起襄陽
也大盜未夷荊棘王師爰獲渠魁搗其巢穴脇從罔治
實維龔渤海是儀以至開府滇中獐獠興亂閣豎作鎮
誅求珍玩公乃匪敵是求而貪婪是按他莫敢問而持

憲斯憚乃沒郭英王敬用竄奸不至蔓是稱肅僚維周
之翰矣林俊下獄於永昌寺也則自以其身之去就而
廷爭乎極言敢諫之士秦紘罷斥於安遠侯也則身以
其國之是非而力挽其甄淑別慝之風社稷之士知無
不言直聲動天下何未免於好名之議也君子之心為
而不有用舍隨物化亦唯恃乎大道之為公秉銓孝宗
之朝大注明良之眷志在拔竒舉而能先耿鉅鹿李襄
城張莊簡彭惠安何旸江周太原清節弘猷維時之彥

豐芑數世之所培植海內善類之所推薦同陞要地頽俗丕變庶元凱之可逢雖異官而同撰懼瓦石之相舍精題才而不援帝曰尚書元氣北斗實維阿衡冢茲群后何必密勿陟降左右奏爾訥謨無不自牖其知遇以隆其業為以久何二三執政而莠言自口豈不仁者之未遠而孤立之難乎後哉亦惟止競雖人主之近戚而恩有所不能私亦惟黨正雖宰相之仇讐而權有所不能施及至藩郡奉職無狀又未嘗不引咎以為辭某邦

士是式高山則仰詢諸故舊百蠻是長凡九閱月而䟽
二十上鬱鬱重臣不可為象祗役天官心折前修簿考
中正管彼九流尚論天造而此其好述番番元老誰適
與謀是故先臣李獻吉有言居則岳屹動則雷擊三原
輩出忠良外植大事斧斷小細海畜帷幄佞幸請劔必
殛斯其存亡禍福臨乎其前而已凜然有不可犯之色
矣蔡介夫亦謂公本治易涉獵群籍學問益人垂老不
寘侍講經筵體履特異先未有事安生忿懣斯其性與

天道觀乎其深而已淵然立時出之地矣而况歷侍五朝天下跂足而望元老燕翼八座後進扼腕而言世家美周召於當代謂唐虞其未遐也

祭韓公邦奇文

維公既持丰采亦崇經術大節屹然高名茂實蚤除銓曹讒殄是聖陟明於朝黜幽於室地震陳言極時得失乃謫平陽才浮於秩大獄既訊藩王廸吉擢僉大臬愈多異政鉏強洗寃浙風用競奏罷四府宦豎斂手亡何

詔繫不理者口顛沛必仁皇孚盈缶既歸杜門彌興孝
友大同之變畔者什九公叅冀北叱馭而走談笑賊庭
元凶授首反側以安驅此群醜是時冀北便宜可否萬
夫一身彼其何有雖才應猝氣亦足徵帝嘉武功再涉
中丞總憲上谷戎狄是膺利用禦虜則莫敢承改督三
晉愈嚴備邊圖上要害于深于堅兩移亞卿執德罔愆
惟允勅法惟明薦賢尋以高第召主南臺掌大司馬軍
國是材屢建大議稱是良哉既乞骸骨著述益精胡天

不弔失此老成某仰止匪今懿厥前修撫填西郊文獻
是求徒論出處之大較而景餘烈以為休何斯人殄瘁
逝者如流也

祭監察御史陶公文

克承家學師友孔懷蚤以二戴往與計偕射策甲科官
屬司寇乃遷臺中淑問愈茂出視牧政無邪者思君子
之馬既閑且馳有此冀方邦畿千里帝曰都哉于按斯
止大惠乃心達聰闢明耳目是寄國紀用清夫何惟躬

用瘁歿厥王事匪諫靡行天奪之植豈湮蜚聲錫仲之
光持憲於庭譽髦于鄉矣其在某等永惟不忉愈貞百
度才養下吏伊教匪怒莫不俟其嘉猷入告膏澤薦臻
也今能不於邑求言之朝與望治者之人邪

祭王侍御文

維公法家自至憲體是宜識爰高朗度亦委蛇曷激曷
揚具依具違誼之道著時之道微某昔領督學課藝慶
陽公實為理載錫之光施于陳臬式刑用成我躬不閱

自貽令名帝既徵止入補西臺持重者德應粹者才于
浙之役海邦孔懷西蕩巨寇三郡以偕猥予不敏起諸
田間載託屬吏臨之則閑及期而代惠我好音乃埃來
賀遂慰遐心前修豈匹大儒是參為王誦之云胡則堪
豈不篤舊庶新是圖凡霑䟽列敢蹈非夫目為卓越誰
適可居不恤有衆厥遇何如曷私於室而寘于朝宛其
逝矣示民不怵大校于館大錄于曹食少事煩自罔告
勞其言恭朝夕傾注良殷載色載語倏見倏聞其知不

二其人則存庶膺遣奠國士之恩

與殷正夫祭張先生潭文

蓋先生斷斷自將經禮三百曲禮三千曰古是常循循自推成人有德小子有造吾黨與哉嗚呼世方猖披誰者章甫衆乃恣睢我焉執矩不知繪事後素赤子大人蒙正於聖功覺先于天民如有用者周官以往惟可語也性命而上龍也少孤且貧未嘗無誨機憤自動困不復廢故今猶夢寐其側誦習敬業如楚在背儋也通家

舊好道尊情愛毀齒就外洒掃應對故今猶務求厥初
模範是因壯行未艾嗚呼先生遂使接跡朝廷之間以
縱觀百官之富而追思乎比肩函丈之地歸然宗廟之
美獨存愈歎一時身親受業之人未嘗非齊魯之彥而
顧瞻乎合志同方之士靡然江河之趨莫援龍惟憲之
司儋惟詞之垣民生於三均茲為義師勞功半益著其
恩雖措紳布列海內之才未量而廷庭自愛天下之事
可論信乎問為邦焉入乎其室其名世者出乎其門矣

嗚呼哲人既萎來者之悲又安能無喟然於君子不匱而逝者如斯哉

祭外兄郭大器文

於惟茂祖蚤譽孔彰舉索中路千金者裝守以待客不取其償是用高誼作賓于鄉齒惟三十庶老雁行在昔先君締好不忘實為館甥克開厥祥矯矯諸父駢迹宮牆大器迪訓亦既升堂任俠耿介豪聞一方博奕是賢修業而息爭道滋恭既饒用德中歲肯構恢復愈力比

隣官豎并兼蠶食雖速我訟百折莫抑其徒造佞詭以
為期躬詣其庭輒抗其儀彼乃挾眾官辱見持惡聲必
反危坐不疑群小吐剛益穢其辭務挑厥怒甘心面夷
乃嗾父粹體無完肌左右慮變相顧詢詢計罔所出或
誘或恐覲我引謝釋愧買重罵詈益奮神色益聳思挫
一毫等之弗勇曰爾遺茅禍不旋踵氣盡語絕昇尸
而出其貲尚裂其身未屈名動藩王治獄私室既殛仇
讐脇從罔逸我則不貲彼亦是暱可以不寃勿謂非質

小懲大誡餘黨自失古齊烈士崇聲畧實維賓卑聚千
載同匹嗚呼哀哉靈其與悉矣

祭尹商衡文

曰世之論人者無亦僻哉臧否何常顯晦徒跡眩華狙
習有實匪覈爾其情隱可原事微足繹豈無恃良友之
殊知而遂使遺德之蚤斲彼乃轍擊負入充棟券積左
賄使氣揮金廢籍捐賢溺愚脫然若釋營一意而務就
傾千緡以勿惜苟睚眦之與值雖多怨而放獲締好關

閱聯姻郡伯邦族稱鉅邑豪避席交不和衷漠焉楚猶
勢重臨而益厲驕微施而廣隙故詭衆以倨辭吮群俠
而取懌獨義屈於國士而色動乎偉策雖褐博而抗言
亦振衣而引謫此夫亦馭富玩貴取順辟逆才有所不
挫性有所不迫者邪余見其奉身宴安鴆毒匪阨疾剝
及虜蹙不至額置心真曠瓠落自斥垂成遽棄中道女
畫則已視紛俗如汚已以生寄為旅客矣雖稟資之或
偏已默合君子之志適則豈不與彼身為物累心為形

役戚然若不終日惶然若不得所索者懸隔乎

滄溟集卷二十三

欽定四庫全書

滄溟集卷二十四

明 李攀龍 撰

祭文

祭西安洪太守伯時文

在僕弱冠受業諸生握手一堂譽髦用成始偕計吏入
對大庭及爾如貫我心載寧尹彼吳興才非百里已則
神明民斯赤子孰銘厥功今之冢宰片石巋然德音未
改既遷地官北虜侮予飛鳥輓粟捷於羽書王師燕喜

莫敢告勞歸主章奏紀綱列曹懿厥度支乃見經國轉
餉朔方不稼不穡士愉馬閑疆場以晏所謂伊人戎有
良翰皇嘉厥績名邦簡臨襜帷戾止克覃其心震蕩之
餘家無完堵揮涕下車問其疾苦省刑薄歛剖滯若流
可安者公匪地是謀厚載維人坤儀靡常我室翹翹侯
茲降祥杌隍之危孰不累卵政未及暮履道坦坦居有
積倉亦以禦災倬彼雲漢百姓于推躬自斷罰郡務遂
繁旦夕熙明乃蹈斯言病不遑息愈殷卧理浹旬在告

倏焉不起聞當屬纊男啼女乳不及後事興而問雨嗚呼伯時何用為哉而身不閱百姓恃將其誰哉某昔也分符且之鉅鹿祖席諄諄勿淪於黷素尚泊淡侈將自覆持憲關中於焉邂逅依依他鄉歡然道舊首倡士風以光俎豆誼正自尊師嚴不疚是其語猶盈耳不居者形苟為衷未和而求之杳冥乎嗚呼伯時之靈

祭鄒明府文

順德逆命正乃裕如豐才嗇施自得則餘若夫欣戚係

於用舍是親世而身疏能取愜於適意可流動而不居
矣維先生英資秀發幼齡崇志浩浩鬱鬱鳳翔虎視振
俗障流宗盟士類并掘篲覆高山深泉周作孔述聖熄
明愆學以辭達竒能取忌即空言之徒競爰慨然於小
試召杜新鄉卓魯陽城絲綸散於理絲熨調寓於解爭
暮月二邑風雷千里懸蒲在庭卧轍當軌恫瘝爾民優
游吾心既觴且咏言弦宓琴昔十俊參名三齊騫羽談
詩避階乞文環堵及飭治於遐方覲功立而脫組卑官

勿羞頽乎就愚事與義便躍以往趨執一於是守關萬
夫樞要肆侮螺蛉斯藐依彼古常毒甘群小我違我歸
匪祿伊貞故嫉諛者必忤衆雖阨困而能亨顧康濟之
罔謀胡委託于尼止既韜己以密藏何美服之誨指進
以冠紳退而韋布非軒冕之避榮耻衮職之未晤彼名
辱而華躬顧簪裳以載路仰茲令操立懦庶頑奚其為
政敦朴以還孰云矯異愈堅末節克家嗣徽迪訓承烈
有翼垂雲伏林未起邦閭卓稱喜難於子

祭良醞署丞馬君文

在昔世家由禮爰彰貽穀士不化於豐芑國何賴於喬
木也開業者艱承考者逸心危而得志損則失此夫武
有不絕之憂統或作之無述君子欲為可繼而奚樂無
疆之恤哉唯君有祖早振文圃翕然儒宗德音是茂聲
聞四夷身朋三壽唯君則孫毓茲仁厚聿服清僚宗廟
用酌既醇既裕如揖如授其在同朝之士見其容履之
婉順勿問名氏而已皆知其為大賢之胄矣孰不曰吾

得以識青雲之良白眉之秀邪是雖鵠鷺之訓聿嚴而
騏驥之驟不後昔遊太學無敢謂秦無其人而今在仕
籍並以信殷實由舊也茲何可使不久於代而嗟斯疾
之不偶乎

祭張隱君文

公至性近道不困於學質直好義不掩於樸行華身斯
文章德動物為禮樂視帝力所獨有揖天民於先覺矣
方其幼而失怙靡依匪母一簞者粟百里則負髻齡織

儉斃葬在疚不振于宗違恤我後宜無忘於愈䟽而不
睦以有咎也暇日修孝不宿不藏諸父昆弟思輯用光
婚姻孔嘉匍匐有喪貨財可私本支未昌敦薄寬鄙微
猷是襄此圯族所以為凶而公自履者祥也又其少而
治產適我御窮俛拾仰取力畜務豐若貨殖於受命謂
奇勝之自躬能者輻輳不肖瓦解彼居息幣唯吾與通
若宜無忘於嘗艱而放利以興我也未衰戒得積而思
施館有遺裝偕旅罔知緘誌以還歸慰其嫠非能讓財

昔饒爭時激貪勸廉末俗以移此姦富所以為下而公
自居者竒也又若外示怯而重為邪中賈勇而羞使氣
里有少年謂我易與閭之長者式復以畏獲金珥於墮
穉而女泣不生止以待夫求者取諸懷而予之以行隣
婦就汲窺我篋笥慮貽之慙趨以引避晚即廢著羸經
遷儒厥季蜚聲用賓王衢父飲於鄉子薦於藩詔賜爵
以優老齒及耄而彌尊奚其為政家惟化原何足以臧
善斯類蕃某等視必達於此邦而與裁於吾黨久矣痛

君子云亡豈私淑猶存邪公其尚鑒於斯言哉

祭璜山趙隱君文

先生代有厚產業乃鉅族幼安於倉箱之積而無遷技
好壯修於忠信之義而無忌穡服千里則美處不愆仁
于宗則和室不去祿廬城諸豪負勢任利父老有三害
之耻一至其門靡弗左右相視遂巡言事璜山衆弟雄
才偉智閭巷有二難之謠每親於身靡弗徐行肅侍協
恭飭志旱乾水溢指困而授長吏即郡庭徵辟亦跡所

罕至歲時伏臘秩筵而聯群季逮妣祖祠祀尤躬於自
致是孝友篤之天性而淳懿概乎人情聘魯貴公入境
而問俗若獲麥邱之隱瞻岱高士及麓而仰風悼茲蘭
谷之英日用之常則樂衣食之遂為榮我田既臧千耦
其耘言就爾居百堵皆作甬如雲興悅懌有穫築不日
成墜談是恪素風比湯沐黃髮詢廟堂庶祐用篤多男
且良八慈為龍今過其歷九雛皆鳳世謂之祥俶載南
畝侯旅克諧儻于東序寔殷孔懷厥仲承家紹儒衍澤

昔從吾游崇心畧迹嚴君與依來朋莫逆觀直諒於分
體邈洪深於濬源常慕斯無懷氏之民而誦其有道者
之言今其逝矣何以謂大德必壽未之思也豈或有不
忘者存邪

祭王給事中封君文

蓋公初効計然之策即負向平之識有志四方廢著而
息千金自衛連騎鼎食觀貨淮揚浮游南國不訾者身
竒勝者德洗腆用歸肇牽車牛處士之義退而彌修以

亢厥宗無急不周何有何亡黽勉是求獨切有穀之思
而裕後以貽謀也侃侃給事實厥令子在昔朝鮮世崇
臣紀曰明是常以享以祀帝曰行人辭命是美往立之
君錫我繁祉服以上公使者宴喜外夷望風高山仰止
徼福朝廷永言東鄙海為不波自今以始四牡載旋報
成我后詔書相勞俾省章奏何以柔遠政惟由舊尋長
六曹直聲益茂歲當述職諸侯率從黜陟幽明有來雍
雍乃抗大疏為國建策岳牧刺史臨下有赫誰其共理

良二千石令允近民無自立僻百里之宰父母是獲仁
即衽席暴亦肘掖考績無微官邪無卑甄別淑慝孰其
可私巧文相謾法有不施臣于其時鷹鷂擊之帝曰俞
哉納言惟允乃絳吞舟以厲庶尹小邑知創去惡斯盡
矣天下莫不謂趨庭之訓惟肖克敏也某等謬以風誼
蒞陝以西邦有典刑俾政不迷何天不憇遺一老而物
有所不可齊邪

祭王給事封君文

視業以息志於四方千金自衛觀貨淮揚浮游七策不
訾是將處士之義退而彌彰何以亢宗燕貽則良式穀
者才竒勝者子朝鮮稱藩往錫繁祉帝曰行人辭命之
美外夷望風徼福東鄙報成我后懷柔遠人俾省章奏
密勿經綸尋率六曹直聲愈振既集岳牧幽明黜陟勿
輕令長為虐為德既已近民百里寄命遂乃抗疏一新
大政績微必錄尤嚴苛競孰其敢欺具曰予聖臣當其
時糾察官邪庶無遺姦以害國家帝曰俞哉其惟共理

郡邑既熙父母孔邇侃侃給事論思以和有此黃髮庭訓則多某三秦為憲移風向淳典刑云亡于何其臻

祭少司寇楊公封君文

唯公所謂隱君子而逸民者哉幽燕古稱多忼慨悲歌之士即少年使氣容有肆而凌人惟公其儀不忒是亦為政悼哉司寇克紹其慶廷尉司空二茲民命三丞相臺著聲諫諍休有烈光用基式敬屬毛離裏繼善成性當其還所遺於嫠婦者盈貫至今漁陽誦不疑為長者

加之投所選於父老者一錢愈使山陰謂劉寵為廉吏
不言而教可承者志父子同心窮達一致九十四齡日
閱諸編伏勝授書異代稱賢四子六孫星聚百里荀淑
為樂婉美前史不獨浚明有家者仰先民而漸世澤亦
使觀俗於野者嘆王畿之多耆舊皞皞以徵帝力煦煦
而近天覆某等方覩維喬之向榮佇觀邦禁以有成乃
與化俱逝詔斯令名則誰不撫燕翼未終而溯源自生
以無堪於情哉

祭畢封君文

嘗聞陵陽而南浸江之邑其境清曠靡流尚輯作苦無
凶歲服嗇無富人家稱隱君士稱逸民先生於其間也
不位而以德尊不名而以義揚排難解紛慕魯仲連息
爭化俗慕王彥方族相附如行葦之於本群相恃如候
鳥之於長無論君子之至邦善者之入吾黨莫不見閭
而式執饋而饗將以觀淳朴于式微得耆舊於草莽也
爰有譽髦實生膝下早承嚴訓聿追時雅謂余志在春

秋用謀貽於弓冶乃登宗伯載離司寇其文則史藝成
而上既明惟允法處其厚某等分曹而治麗澤以居每
取斷於引經各獲益於啟書片言父教自出五聽帝心
所屬鯉也過庭由也折獄道同者友寀同者官或逝之
源或漸之磐朝錫命而夕考終木欲靜而風不寧是徒
遺後以不報之情而示物以不厭之形矣

祭德王妃劉氏文同許右史

維靈淑姿聿茂厥祥不遲翩翩吏部於誕之奇赫赫大

藩實維我儀亦既嘉止陰事咸熙居則命史動輒稱詩
雞鳴致戒樛木致慈克配令德君子攸宜有來雍雍被
之僮僮于沼于沚在廟在宮為締為綈為綌為綌思媚
厥姑徽音日崇壺職靡忒國乃始風某既西觀采人倫
是常歷彼二南彤管惟光邦才委質而右夙忝惟良無
詖私謁以二周行胡茲不造溘然其逢原達者流表植
者從貴不自身伐不自庸主器以長維城以宗茅土百
世厥萌在初休戚是同山川舍諸日月之際此維有家

屏翰之功豈其緒餘載罹寒暑言即於幽維王內顧曷
其有瘳為樂以善隕哲惟憂琴瑟不御寤寐是求某等
悼逝則深敦誼綢繆生芻是將以慰阻修

祭樂平令羅君文

維靈蚤歲明經百行是常阨於多士闇而愈章卒業太
學尚友四方觀德問藝中心翱翔既除茂宰臯落之墟
三晉遺風肅如穆如戴星而治鳴琴以居績用是成曰
父母且曰父母且靡民匪子孰克厥家選曹嗣美銓管

九流檢裁維理出納王言喉舌之紀帝眷巴蜀中丞用
遷趨省于庭朝夕是度奚其為政維茲象賢中丞自邑
御車而旋進維良吏退亦敦仁以勸頽俗言復于幽胡
此不淑殄瘁駢臻不朽者澤垂裕後人

祭殷太孺人文

孺人名族世家降淑自天別駕覃澤有開必先亦既歸
止思輯用光乃遭中葉伯嫂是將裘褐在筭糟糠在堂
雞鳴視具蠶織日常井臼操作不徒為養琴瑟靜好既

翁友于人逸我勞孰終晏如人侈我儉孰終有餘蓋已
自失其貴倨而不愆於厥初唯是君子夙夜敬忌未嘗
片言以相加遺婚喪疾苦是問是饋何有何亡務成其
事簪珥糞土可捐非義使不困於急難以永錫乎爾類
變彼檢討孩提自竒孺人自謂不肖恆斯豈其必盛于
以轉衰弱不好弄而壯有為德輶如毛一錢勿持既就
外傳歲五更師在昔三遷異代同慈既宦詞林愈嚴教
思人以烜赫我以委蛇始誰先容寵至不疑順取逆守

工拙半之祿即非羸饔飧不遲買馬得薪買奴得蔬物
將棄而適用事可已而競時蓋自乳哺勝衣通塞顯微
仁人所見無非母儀靖共在位性分自定文章華國志
意之榮坐而論道其則不遠必聞其政無忝所生氣所
相屬誘以其衷愛之能誨正以其蒙不儼然為大儒必
隱然為重臣尺筮不施孺人聖功攀龍之於檢討處則
同門出則偕計自公退食靡日不詣交相定省如兄如
弟手足一身堦筮六藝孺人蓋嘗視猶膝下而將不億

其麗也大化一遷云胡不瘳桑梓殄瘁非夷所謀其在
攀龍與此靡依世德是求逝者弗居徽音是道無疆維
恤無疆維休

祭何考功太孺人文

某等聞諸母儀訊之女史則有若漆室之於君臣緹縈
之於父子而其雖值離亂稱義則身全雖在負汲稱孝
而貌祀與夫杞梁華周勇下五乘之賓鍾離宿瘤治禪
二王之美又莫不嗣徽音於齊魯之墟比懿德於海岱

之里蓋家傳而閭誦或異世而同軌也孰若孺人質之
耳目可徵其實邇之子孫可識其始哉相夫於儒婦道
乃成撫孤而仁卒貽令名考功之所以茂品藻之譽擅
題才之術則誰與豫導其神發之智不失其孩提之明
故清通簡要欲養於總角之初而立訓示慈愈深於屬
毛之愛蓋士有披雲霧以覩之莫不即音容而如在也
方其奉親入蜀悼茲王陽長坂九折白首是將於時孺
人不以道惡為解而以忠臣相期叱馭使前安顧身為

三年理官已人去思所得賢智莫大于斯今其逝矣雖
章服朝委而令聞天終使待銓衡者懷俎豆之教見經
綸者思機杼之功復以讚孟母開聖之烈而益彰我鄒
魯君子之風矣某等能不悼淑德之云亡而俟世類於
無窮哉

祭梁武選太孺人文

以某等所觀於母者漢平陵孟氏為得其槩哉始也女
貞不字偃蹇擇對及得賢如梁伯鸞者奉之乃能更綺

縞而椎布操作以自代益見其償豕之義雞豚不察是以賃舂之賤而并曰匪敦彼所欲者裘褐之人吾何有於雜佩由是而夫為大儒受業太學仕隱一邑民稱遺愛是亦居於齊魯之間而風澤猶在也三子毓秀最良季者早擢進士官屬司馬又嘗觀所恪共邦政慈訓攸從則不必同諸臯伯通之庶下而可識其具食舉案肅穆之容矣起於緝績而加茲象服則益榮昌於後裔而名以德曜則稱情今其逝矣見君子於地下豈徒重要

離之烈而成其高清哉

祭郭子坤大孺人文

曰淑德近質苞實則蕃敬德若蔥令儀則敦允秀於閨
式宜厥家勿愆爾婦毋用孔嘉誰願之室匪賤賃春三
十始字梁鴻是從懿彼景純文絕地紀相茲肆術贈珮
脫珥恭其諍夫愛而誨子謂彼致遠易轍正軌舍馬可
遷從業則是無泥舊學有律有禮季以鶚興卓哉修士
囊書在篋一經則珍遼矣俯察法邇在人豈伊慈闈趨

庭有嚴虔所代終以依以瞻有睟其裔天祉方錫何以
固極報之貽戚某擇交齒齡睦焉諸嗣親以異膝友以
同氣窺所與遊無棄童穉時已知興託息委器長而績
儒聯編俎林入受訓言出敷義箴澤麗有源與茲隱悲
悼我良朋其胡有夷

代祭裴御史太孺人文

惟靈克嗣徽音有淑其慈裕我後昆是良母儀適而宜
家行以克閭御史迪訓穆如肅如相範既嚴邦人錫嘏

不踰戶庭澄清天下出貞庶度入憲一臺激之揚之秉
心不回既擢陳臬視學于東齊魯狂簡斐然嚮風載色
載笑澤斯用溥為邈者三敬敷者五卓彼大儒式弘譽
髦一經則傳孰哉劬勞既成厥績載藩中州叅佐旬宣
溥彼承流夫何遽爾靡依天喪懿德殄于其闡瘁于其
國某匪良奉職牧此冀方早辱汲薦錫我寵章其在望
丰裁而擬所自始沐甄陶而本所為親則已百察服義
而多士懷仁矣矧知遇之殷而夙誼莫愆者又能不戚

於爾類以嘆息於開先也

祭何考功太夫人文

夫人少膺懿粹誕茲淑貞婦德既備母儀以成方作嬪
於鴻碩遂媿美乎漆室耻獨為君子而覬魯之多賢由
是尚書授業生徒景從而典謨誥命學是有傳時則邑
有大儒家無治產佐以機杼簪珥是捐可謂有相之道
伉儷弗愆矣乃育考功屬矣所賓尺孤是託罔極於仁
慈以養智穎發所因有經者苟有泮者隣及其對揚于

大庭無非正始於內訓而平反之為孝子即其叱馭之
為忠臣故三年於巴蜀稱其為理九流之銓管所賴以
振也識者以考功清通如裴楷謂馴致於俎豆之教恬
正如李毅為不失其孩提之真則是帝所難於知人之
哲而我玩之膝下壯所聖於養蒙之功者而我通乎一
身矣是宜象服食報錫類無垠也逝者如斯得於披覩
者益歎歎乎哀毀之色矧某等有兄弟之義又安能無
痛於殄瘁薦臻哉乃虔楮柏載列明裡

祭胡評事繼母袁太孺人文

於猗孺人三原令族昔在于歸遭家集蓼方封君失燕
婉之好而徽音之嗣難也時則閔閱於邵公之黨衆即
擬知其貞淑矣載及廟見克謹婦箴乃賓饋饁如鼓瑟
琴視美舊特異形同心其於相儀猶易室而相授遂使
君子若未嘗或亡耦事成定於委裘跡不駭於發笥是
坤道所厚也以至嫁未學養卒貽之子愛非已出遽怙
之母唯吾不愧於復生斯彼罔恤於厥後哀此四人孩

提何知其季始育不絕如綦則令屬我毛裏離我衷曲
躬澣襁褓身需携隨哉非見夫戲嬉啼號之皆為慕已
而以長茂成立為足以示慈者又烏能內外無間辭乎
今既以咸樂有室諸孫日蕃篤我世祜其澤愈敦矣獨
異夫兆微於廢興之端察先於童齒之智仲而茂才卓
彼國瑞開羸經以勸學捐佩珥而修贄使就大儒推先
士類庭中稱平天下受賜尚亦有利哉是為孺人誥言
所崇璽書則備宜錫祚於無疆忽造物者多忌豈粹德

易價而福善之語猶偽邪

祭饒侍御太夫人文

蓋聞夫人令德惟貞淑慎爾止以憲相內外傳伊始家
以慈母國乃拂士襁褓之功諤哉君子設俎秩秩攬轡
瀾瀾蓋屬之毛裡聰明自出寄之耳目謀哲其諧也信
蹇節不可謂非性而氣質之用孔皆矣某等論思一臺
伯夔仲龍澄清四方協恭奮庸其將以知興之所從嗚
呼已矣徒悲烏鳥之私未遂而列栢之蔭無逢矣

祭恭人文

嗚呼恭人惟性之樸惟德之基方其御窮豈達是明貴
有今日寧爾所知援而止之不躁不疑中含辯慧自夫
則狂無非無儀得以相忘嚴于寡姑佹焉下堂懿斯象
服允矣糟糠見一鍾於乳哺殆匪子而靡親尸饗勸學
孰百其身謂壺政莫大主器而承家實在後人中櫛委
勝託息茲倫亦既抱孫受福不那於以效我為勞孔多
代終有慶遑恤其他撫遺孤而對泣奈蘊結之云何

自河南告太恭人文

隆慶三年閏六月十二日兒攀龍告母曰三十寡母九
齡之孤既即外傳擢第王都京臺郡邱無弗與俱匪朝
匪夕是敷是愉自西振鐸為孫孔旋起家于浙為婦告
捐誰謂河廣力疾以遷誰謂天遠喘息判然十年自廢
菽水庭游尺書斗祿胡適與謀豈母之溺狗孤則瘵未
畢正伏溘焉首邱暴不及訣危不及持母豈自意孤常
自期毋令安往藐孤在茲出則不返返唯其軻亦云就


養孤則不良詰旦東發視彼故鄉我父迓之歸于其藏
母也有孤是護是將謹告

辭太恭人文

兒則無良曰母是怙自柩之東旅馬是主竟魄所依亦
唯環堵既啓父壙叶吉載祖三孤具列永言為懽爰致
大誼以孚振古厥初生民兒則孔辰實始立慈終焉允
仁未存者子未亡者身扼我者天競我者人于時九齡
母倍者再季誕逾月仲癖且廢左提右携乳哺自愛中

外嘖嘖幸母之貸于時母危如旒欲潰母今在茲往將
安在成說維何躬之不逮乃奉祖母鬻宅以遷舍館未
定祖母載捐展轉五就是粥是饘非不拮据溝壑彘馬
季乃間出十載不旋仲情以慙如寄食然兒雅好游搦
筆自賢母豈知兒可策而前知匪所託大信以全貌焉
諸生技僻而堅辟之行喝挹彼流泉母豈不知置之自
便筮仕就養視歷艱難是甘菲惡奉有餘歡曰兒不第
終饑且寒兒歸自西三遘竒疾母亦浸衰勞之即逸駒

也喪母造駒之室百爾孫謀不如所質兒既起家就養
有日其不命車顧孫多恤顧已念兒間以有孫豈無二
弟不及其門兒歸自浙亦閱涼溫寧加至性而老彌敦
兒方自慶所樂與存家有我母國則至尊亦既入賀陟
憲中州板輿載駕色不可留無幾見汝亦又何求自春
徂暑朝夕北堂弄孫之暇語必故鄉母即暴注恬以為
常兒愚匪意豈母所量相視一訣洞惟肺腸蓋云累汝
千里是將詰旦之役將者告襄母所未亡母今則亡



滄溟集卷二十四

欽定四庫全書

集部

滄溟集卷二十五

六

詳校官庶吉士臣柳邁祖

中書臣劉源溥覆勘

覆校官中書臣朱 鈐

校對官中書臣嵇承志

謄錄監生臣陳振德

謄錄舉人臣張元功

欽定四庫全書

滄溟集卷二十五

明 李攀龍 撰

雜文

都御史朱公居東遺愛卷引

稱遺愛何為也為都御史朱公也其稱居東何也昔者
周公居東東人居焉不系之周也公既入為大司空山
東之人猶私焉不系之司空得稱居東也始公之居山
東則濟南之搢紳先生若郡邑弟子莫不曰我未見按

察如公者今安得久居此也既而莫不曰我未見布政如公者今安得久居此也既而莫不曰吾未見都御史如公者今安得久居此也凡五年是稱遺愛也周公之詩有之是以有袞衣兮無以我公歸兮無使我心悲兮周公東人之遺愛也又曰伐柯伐柯其則不遠我講之子籩豆有踐周公遺愛東人者何言乎遺愛東人也書曰汝陳時臬勿庸以次又曰以藩王室綏乃厥位是周公所命也而必以丕惟者成而必以率由典常何也

所以遺愛東人者也之子不遘邇豆斯遠非周公之材
之美已奈何佑乃辟廵侯甸撫萬邦永康惟無斃也無
斃為言遺愛也公為按察務隼彘而不必於用訖公為
布政務正供而不必於用惠猶日存諸搢紳先生而進
郡邑弟子與論焉曰得無失迪知之士然後舉郡邑而
顯治之靡保匪蕃靡釐匪臬猶曰今為得若在昔無斃
乎是都御史朱公也濟南朱先生弟子故斷斷自信自勸
以急公家之誼而後朝食也雖無考成尚有典常是為

習公公以習諸先生弟子者亦具是矣何患乎不得久居此也不然於措紳先生望而拒之視郡邑弟子不可使不遜斯未能有先以為百姓望者雖今貌祀亦於是未致也豈獨以袞衣哉古之大臣官無間地澤無間時施無間人其為遺愛備矣濟南措紳先生若郡邑弟子得朝夕公而事焉跡詩書以周公跡公以詩書得稱居東也然不系之司空而系之都御史者以嘗不以未以溝不以歸以習不以異勿諱乎其私之也不然咏歌

之無從公奚取焉

青州杜公家邦迓慶卷引

蓋公為青州四年於今矣所臨諸令長時時各舉所為
縣者狀人職相得也所移牒若條為記惻然奉宣恩澤
使百姓咸知有明詔諸令長亦既傳相勸課惟恐詣曹
對簿負太守共理効者而百姓耻逋租稅遜于徭役誼
相屬分相親若家人父子一堂之上四年如一日而治
行稱長者四境之內雞犬相聞鳴加和吠加應也而謂

無以致家大人之教惴焉不欲以治行自引諸令長愈
益勸課百姓愈益彊於租役監司御史中丞臺交相勞
也而薦書擴至且以遷行猶之謂無以致家大人之教
也是年太公年蓋八十云公且計以遷行將便道謁太
公稱壽一堂之上而無以致其教奈何為治行矣然公
不言也先是迎太公青州而太公問為青州公亦不言
也然太公已見公御無長物事無長時私自喜之謂公
曰吾往見爾大父為龍江驛至為按察使覆大獄而不

難於反郡太守征蠻之役幕府交檄從軍自蘭谿功曹
舉五十金裝畀諸亡者御豈欲有長物事豈欲有長時
乎吾不謂乃得見爾大父於子也信斯言也公蓋四年
不忘家大人之教於此諸令長勸課百姓勿失其租役
太公不知也然而察庶諸令長其自潔以不取如將不
啻亡者裝交錯就檄獨賢載路不遑暇食猶為守臣四
年於此且以遷行更念諸為縣新故無常令長者人職
或不相得吾所移牒若條為記法度具是相緣為姦動

必廢格吾豈敢知之哉問閻邱先生有後乎何為至今不祀也閻邱先生者嘗見齊宣王而稱選良吏平法度臣得壽矣者其人也賜無租役不謝焉租稅者所以自存其業徭役者所以自存其身而命縣於吏幸而賜之復以非法度不可為久也選良吏以平法度斯租稅正而徭役均百姓享數百年之利無窮時此不二千石所恃以為聖天子圖共理而致家大人之教者哉始龍江公為太守覆獄而畀亡者金以貽太公而公更欲以良

吏法度行青州數百年之利以致家大人其計可以為
久即紀以八十不與焉意在諸令長不言也乃諸令長
以有言而余識之如此

答濟南父老報殷太史文

正夫既授檢討者八年矣歲丁巳乃疏以郭太孺人歸
濟南濟南父老相與以弟子請曰檢討家自曾大父衡
為永平邵文學徵授德莊王經誼永平後進皆從文學
德邸中及王之國蓋天子賜璽書勞焉大父峻既省試

則河南許襄毅公以莊敏文簡二公從其在太學又如
劉大司馬龍大中丞夔兄弟徒衆尤盛知名者也至今
諸齊言禮者無不自出殷氏矣檢討家世傳業稱山東
大師今幸詣家願以相累豈無意乎吾黨小子哉正夫
常稱學廢推讓未遑乃不得已於父老而許之為受徒
數人屬太孺人捐館舍積至數十人攝衰臨藝是歲省
試得中鵠繼宗禹者三人次年傑一謨者二人顧濟南
諸生則業謂禮經多不受受它經正夫各為持論如其

家家不能難然亦咸得以舉大誼如是者五年余晚以
駒事正夫問詩數篇所受經即嘗聞之張先生所者蓋正
夫結髮與余事同郡張先生數年以家世故即更它受禮
云明年正夫起家以其官入說經學裕王府中矣父老
則相與請余曰二三弟子安從卒業乎即中廢何以報
檢討也余曰父老安從知檢討之相為二三弟子者不
愈蓋亡已時國家設科射策二三弟子視以為祿利之
路則然矣莫不以朝受學弟子員即夕効高第取右試

官耳吾業既與恬然為此而又勸使勿亟其孰信焉故使二三弟子受學身自致當世吾猶人也効高第取右試官予安能知之即因以長躁進之心傷揖遜之美有寧中廢報我而已一以躁進使自致當世何不至也畔師孰甚焉吾所願其大者受經學如漢諸大師家次者即若許氏劉氏諸兄弟以不忝家世吾豈願此於二三弟子哉檢討且八年亦旦夕遷耳又方今文章之臣斂然在興突之間簞席之上不次當御以儒宗居宰相位

一何醞藉此豈不夙夜在公之義而五年於家猶曰今
朝廷大儒骨鯁白首耆艾魁壘之士論議通古今喟然
動衆心憂國如饑渴者何限吾幸得請歸與二三弟子
相訓故說經誼以增益不能游息卒業庶有用我往以
是矣此自父老所見二三弟子雖亟自致以效父老然
有不可知則以檢討身為揖遜猶未失為是也身為揖
遜而後乃今儼然總五經之眇論鄉唐虞之闕道以陳
於王前以為聖天子主器者重以感動二三弟子若難

而縣之而實使自得之其相為豈有已時用意至深父
老安從知之也在昔有漢既以玄成為淮陽中尉而孔
次孺尋以詹事遷霸世大儒忌爵大過懼德不堪又何
推讓君子猶之可以受而致安之無得不得由是矣聖
天子方日隆敬承之緒以有事燕貽天下自主器所有
宰相自儒臣所為正夫奚敢見焉而可無用推讓即朝
廷用檢討意初不出此然正夫幸已備侍從守師傅猶
且推讓不敢自見二三弟子身將愈益勸豈為中廢無

報乎父老幸歸報二三弟子也

為太恭人乞言文

不肖年九歲為迪功君遺孤太恭人年二十有八歲襁抱二弱弟稱未亡人祖母揚暱於前子憂不肖暨二弱弟長則當薄其產數不予太恭人志也太恭人即傾贏中一勿問之唯朝夕糊饘粥是命曰彼豈謂未亡人重捐生即不忍此二三子留留食嗟來食相與僕僕轉溝壑也地下有言此二三子安在哉未亡人其尚有辭矢

靡慝唯二三子焉依祖母楊持太恭人愈益亟顧若新婦太恭人亦愈益肅祖母楊病癰且潰太夫人溽暑身自浣滷傳藥底革而豫宗黨無不難者蓋八年不肖知敬業事諸君子然恒以憂羹失諸君子太恭人歎曰爾何與仲多哉即饜髡如何異也先是有謂不肖不能力穡服賈者兄嫂意難久居矣遂廢箸出各徧別舍太恭人所分貲僅支朝夕母子惓惓相哺也取濟西田自灤水用易岱畝元年三什租季年乃什租太恭人泣曰吾

寡且不有秋何賴哉因貸息沒入富農遷廬學宮傍屬
不肖壹讀迪功君書伏臘行經師修脫簪珥取給焉不
肖竒蹇罔所掄錄又家徒四壁立太恭人困于女紅最
辱泮泮勿恤為之指手至胝龜率日一餼即再殮必鮮
鮑二弱弟在窮閭與傭保雜作自賣奉菽水蓋七年不
肖乃下帷授毛氏詩稍稍致糈養比既稟有儋石儲太
恭人已戒令從游士貧者覲勿用篋矣二弱弟固猶曠
不有室里婦約結縞者竊隣窺之莫不中輟采謝絕謂

何可棄女於是也庚子不肖始應郡舉甲辰詣對策以
第次晚得補司寇諸郎時與二弱弟撫諸孫稱觴堂上
太恭人言夙昔事未嘗不輒泣下罷酒也無以二三子
不易至今日哉則唯大君子有賜言

戲為絕謝茂秦書

昔逮爾在趙王邸中王帷婦人而笑之爾猶能涉漳河
也則之長安在大長公主家又不負一蒯緱劍今主家
監先亟斷席與爾別坐家監乃置惡醫馬爾邸中輒怒

馬使跽於庭踐溺沃爾冠亡何又遷爾於傳舍使與騎
奴同食傳舍長三投爾屨於戶外豈其愛士而執襪楚
以游居暮年傳舍長遷爾於僦舍舍人責爾償僦也若
若使爾在我之他境我何知焉告者曰有君子眇而躁
視事左右必得志然吾憚其為人也則爾既已謁我門
下三日矣我躬授爾簡坐爾上客寵靈爾以薦紳先生
出爾否心蕩爾穢疾元美偃蹇我實屬爾時爾實有豕
心不詢干我非其族類未而言延頸貴人傾蓋為故

自言多顯者交平生足矣二三兄弟將疏間之我用恐
懼貽爾盧生游爾義門不以所惡廢鄉綏靜二三兄弟
爾乃克還無害是我有大造于爾也不佞官臣以敝邑
在爾之宇下不治執訊爾為不弔跋履敝邑不入見長
者我先匹夫爾實要我辱我臺人殄置我不腆之幣於
塗張脉債與皆翳俱裂曰昔在長安邸中殊厭貴人曾
爾一守臣也爾何乃去趙王邸中既已釋憾于我我以
二三兄弟之故猶顧不忘舊勲於爾爾且以敝邑之頑

民行而即長安貴人謀我天誘其喪元美弗二爾是以不克逞志於我敝邑褊小我用疲於奔命屬且夜逸爾利吾失國徼福于二三兄弟曰若不得請猶有令名與其及也我其敢必有功願以間執讒慝之口我從事獨賢則是爾之詒我肆也我與元美狎主二三兄弟之盟久矣爾猶是橐鞬鞭弭在左右與吳生徐生周旋中原不能一矢相加遺我是以大不列爾於二三兄弟爾亦悔過之延使以命我曰同好棄惡復修舊德我尚猶未

懌是以不報爾又不祥惡聲滋至我祇役大行稱詩二
三兄弟其在二三兄弟則同心之賦而亦爾所不能為
妬口者爾有二心于吳生曰稱詩如此他何用糞土為
吳生固甚憎爾是用告我元美惡爾之二三其德亦來
告我曰眇君子不得志於稱詩女則使然今日之事我
為政昊天上帝虞九歌周二雅余雖與于鱗出入余惟
利是視不佞惡其無成德是用宣之以懲不一二三兄
弟備聞此言是用痛心疾首二憾往矣不腆敝賦一聽

客之所為唯好是求爾若惠顧二三兄弟無敢徼亂則
我之願也爾若不施大惠于鱗不佞二三兄弟愛才久
矣豈其使一眇君子肆於二三兄弟之上以從其淫而
散離昵好棄天地之性必不然矣敢盡布之執事俾執
事實圖利之

擬秦昭王遺齊湣王書誅伐宋

秦昭王使人於齊湣王曰宋王無道為木人以象寡人
射其面寡人地絕兵遠不能攻也王苟能破宋有之寡

人如自得之蓋寡人使使者問宋所為曰有之宋可伐矣見祥不為祥乃為禍先是有崔生驪於城之陬偃使史占之曰小而生巨必霸天下則偃喜滅滕伐薛東敗王取五城南敗楚取淮北之地三百里西敗魏軍乃愈自信欲霸之速成築轍臺於宮中鷓夷血縣之自著甲冑從下射之血墜流地命曰射天其佞臣田不禋賀之曰王之賢過湯武矣湯武勝人今王勝天賢不可加矣偃大說既作千鍾之縣遂鑄諸侯之象使侍屏偃屬寡

人象且成曹商自敝邑來言寡人方召醫破癰潰痊也偃
乃更命工加寡人癰痊於面既成謂之曰既微且虺爾居徒
幾何吾為其象人而用之也指大王之象以示其臣唐鞅
曰此冠側注者負海過頤豕視其象不仁也不知彼何所
食乃帶益三副如此於是展魏哀王之臂以彈其鼻曰爾
赫之子哉望之不似人君也哀王之臂急而汰於韓襄王
之肘曰倉也何乃為人所搏不愛顰笑乎乃移使去韓王
咫曰此豈若等用肘足之時復展其臂彈之曰今視子之鼻

間相相然矣何得更挈狗馬西走王豈猶以秦為王交乃今且不得躍吾冶中展韓王左臂曰汝欲有天下右手攫之則廢此左手又展右臂曰左手攫之則廢此右手君將攫之乎所為趙武靈王之象黑龍而烏喙鬚廩髭頰大膺大胸冠術氏冠差池迤邐五采四重貝帶翎翻黃金師比綬不著綬綴以絲綬命曰仇王惟肖揜鼻而過楚懷王曰此柱後惠文冠者始亦為從長至函谷關然無奈其以淮北之地三百里効我也寡人亦似惡聞王之臭也昔者岐陽之

遇爾為荆蠻置茅蕪設望表與鮮牟守燎故不與盟今
其坐之堂下次至燕昭王曰是危欲為朱均者偃聞相
人於師敦面而土色者忍醜爾其忘齊之虜爾父乎其
玩寡人大王與五諸侯無異鼙鼓一日倪侯請曰魯衛
中山雖則鞭箠可使然亦泗上諸侯也即折鉤之喙足
以為之何可不使備下執事乃復為魯平公工不得其
象以請倪侯曰亦果解其冠令王可溺耳為衛嗣君命
曰小侯何為遽篠至今不殄也日者趙氏襲衛爾跣行

求救於魏令其勿令加弔至中山君曰此其准頓權衡
犀角偃月不若其姬陰簡美也又為西周武王東周惠
公而金不足宋人夜拍東冢出文公之鼎彝椎而輸偃
偃不知也亡何惠盜見偃曰有道於此使人雖勇刺之
不入雖有力擊之不中偃乃釋章甫而冠無顏之冠以
示勇盡置寡人大王十二諸侯之象於庭懸鷓夷血於
其上而射之血下漸大王象盡殷則笑曰吾聞博昌千
乘之間雨血沾衣豈天有意乎王之為人也大王象僵

於臺下偃曰梓之曰尚佯僵邪昔蘇代言齊王長主也
有二毛矣先王不禽二毛豈謂爾哉血亦漸主父偃以
蟻其口曰視爾相法當餓死今姑血食哉此孰與崔蠶
美關弓以向楚懷王指其股曰吾將射此以報於泓之
役不能如呂錡集矢爾目也遂召倪侯命群臣以矢曰
此十二諸侯者各令面夷矣群臣乃各射偃之所鄉三
發寡人不中王自往面樹之寡人象仆於臺下則轉巨
石以撞其足曰西垂大夫吾當復絕爾臍矣趣使出木

人射其面飲羽木人者即前所為寡人也已而唐鞅進謂偃曰昭襄無道命齊搆我皆其臣擣里疾之謀臣已命工為檣里疾血鴟夷加於其頸以象其瘞鞅請以一矢踏之無敢辱命偃大喜至則自射之中其頸鴟夷血出如雷大宰戴驩國老薛居州諫臣也以諫偃曰王欲行王政即身屬橐鞬遇茲十二諸侯者於中原之上而主盟之可矣安用終日與桃梗侑人鬪而曰我必勝之乎偃大怒罵之曰子罕之後有睥其目瞞其腹者如爾

於此哉一薛居州其如宋王何關弓嚮之二子趣走唐
鞅既自及偃淫於酒婦人愈甚室中有呼萬歲者堂上
盡應堂上已應堂下盡應門外庭中聞之莫敢不應一
日登蒙澤之臺見朝涉者鏤其脰矣而偃者至使人止
偃者曰是其脰肩肩何為者哉置之轍臺之下使以鼻
承血失之怒而剖其背矣宋人大駭而墨子所設守宋
之備盡廢王速出令是于泓之事也齊王於是率魏與
楚往伐之進兵宋城下民散城不守偃自投車上馳而

走至溫逃倪侯之館而死三國盡分其地矣

乞歸公移

切照本職猥以草茅叨蒙聖恩擢為進士歷官郎中知府以及今職未嘗不誓以犬馬之勞答稱萬分之一即沒齒不敢自棄於明時者矣奈何瞻依盛世固臣子戀主之至情而諱疾曠官尤臣子不忠之大罪本職不幸賦質羸弱調理失宜到任以來所歷西延平慶等處往還四千餘里考過府衛州縣生童六十餘處自夏徂秋

忽成泄痢以致痿瘡頓發肛門突腫坐卧俱防下血即
多元氣日損醫生任某等投藥將至百帖迄無一效再念
本職校閱微能非心力無以自效而頭目眩暈即臨卷
必至失常恐開科孔邇求賢大事一有謬誤人材所關
命在旦夕實為狼狽合無憐察本職得以殘喘生還仰
承聖恩之高厚即雖終無圖報而感激難忘矣

問西安三學諸生策

問九則安錯大氣馬舉幹維馬繫隅隈安處谿谷邱陵

山川多有何所刑德何所牝牡厥上左旋下馬取夫右
轉清濁攸判夫何墳何衍何得以寧今孰發焉何致以
位今孰捐焉何四極之相屬卒其異方雍何傾覆豫何
逢長南北順隙孰知其里胡遵迹既化而厥壤爰止廣
厚何圻儵忽焉合重夫華嶽匪載匪沓陽伏不出厥出
安居陰遁不烝厥烝何如穀洛何鬪何神爭明梁山何
朽何帝不饗子晉何諫后何庸伯宗何告侯何從氣何
以復何所搖政胡臣事是修而代終以慶

問華涓諸生策

問潼關於穀函其猶重楗也在昔彊秦建銳山東注如
決雷每一出兵割地效賂有若俯拾山東諸侯合從而
來止於一夫成列而進道惡為解則俛仰之勢異也今
天下為家聖天子封域穀函不異宇下山以東何患焉
獨以北兵憑陵數入侵上谷北地間而先零諸羌往往
窺西河玉門塞一旦交困秦人之卒空國出乘障矣即
有若往時大盜嘯聚高洛者竊發其中鼓采金鬻鹽亡

命之徒以為有司者難扼潼關而據黃河之津則山東之援不至守武關以分掠漢中諸邑則鄖陽之師不入西北出藍田以犯長安而稱屯灞上雖欲不棄華渭不得也此非王公自失其險而制於人之道乎二三子華渭之間人也其明發念亂久矣何以告我

李淑人大節解

中丞霍公大母李年二十餘撫遺孤焉既贈太淑人掩于帝恩其大節無以自達於上乃中丞狀之曰勤瘁幽

苦精白貞純是先大母之德也余惟八者備矣屹屹乎
大節也哉方其夫以永絕若子在抱亟低徊於一往而
藐諸之謂何跂予望之中廢不可知若將棄焉而旋復
是顧業以黽勉孰與効以大畢之為成仁也量力計期
此伏彼起盖有日月可處而我之未即安者匍匐拮据
不與焉勤矣惟兹子遺甄甄在疚疾疾用勩怛為勞
即庶幾將來瘖痛甚矣而逝者不返終身病之奚必殘
形相拒毀體自絕始為慘哉瘁矣壅闕閔恤鼠憂不陽

如在晦冥視聽玄黹雖猶託于世未亡人耳百爾紛紜
藏之地下獨其所為喘息相屬者細若氣微若聲不可
以己是重蓄也幽矣可以己則舍生以之不可以己斯
生而有所不得舍也難乎其為心矣預防以自困致慮
以自危既秀方實植微壯長有不在我者而志每窮焉
以微惠逝者拂亂煩寃甘此荼毒苦矣立孤難於殉葬
善後優於捐軀二倫是經大義以辨非託於難以竊便
非假於優以苟存夫婦母子無遺憾焉精矣蓋亦其質

固有之既自不飾亦自不渝不然捐軀殉葬本以為潔而益示其華猶曰物永非素以為行也光昭有家泯於無迹猶曰倫足以竊便義足以苟存云爾恬淡是常不以作色白矣據其所不得於舍生之心與其每窮焉之志如天地定分之不可易如山河定位之不可移殉葬自竒立孤自正溝瀆之諒匹婦一朝舉之矣又不然非其性也勤瘁不將以損之幽苦不將以撓之乎貞矣激於始絕而衰于已事與操具而身亡均之失其半也此

夫各成其信非以為名而意自愜不解於慈非以為功而理自全故至于今無間然矣豈其習而便豈其守而存率之自是自致厥美不遺純矣屹屹乎大節也哉喘息相屬命脉以文神明之胄後世必復余猶及見中丞為御史時主課天下郡國上計吏風裁卓然自廷尉中丞少司馬司寇徧歷三臺大績益著於太淑人有餘烈矣勤瘁幽苦精白貞純具大臣之道焉有味乎其言之也

題太恭人圖

攀龍家有太恭人四圖先後出示家人其一則相視謂
曰豈為太恭人其一則競謂曰當為太恭人其一則不
時謂曰是為太恭人也其一則杜氏愷所為圖杜初為
圖家人各言所以狀無不曰有所似太恭人者旦而移
之第二圖家人又言無不似太恭人者今稱杜氏第二
圖而前三圖廢矣乃余以杜初圖似矣及第二圖成即
初圖輒復若無所似者由是而知有所似不若無不似

者之為工然必相形而後真得焉可以無似無不似而
術神矣古賢母所具列女傳無不善畫者莫能圖何
哉漢圖休屠王闕氏於甘泉宮其子金日磾每見之涕
泣然後去史稱秬侯篤敬非其似必涕泣之無從非其
似必漸衰於每見非其似必不難於去之何以潛然不
能自己輒不得以禁中為解乎余見太恭人初圖蓋儼
如也見今圖蓋依如也太恭人稱未亡人四十年孰與
秬侯侍闕氏為羈虜痛哉乃逮今天子賜命服稱太恭

人二十年歲七十猶尚良食撫三世膝下其日且未艾
彼即七葉之貴何以易余哉是故以余從其依如者而
後知杜氏不可以一技論也

王氏存筭稿跋

余觀大宗伯孫公所論祭酒文章法司馬子長氏其然
哉今之不能子長文章者曰法自己立矣安在引於繩
墨即所用心非不濯濯唯新是圖不知其言終日卒未
嘗一語不出於古人而誠無他自異也徒以子長所造

巡不為者彼方且得意為之若是其自異爾奈何欲自掩于博物君子也關中故多文章家即祭酒在著作之庭且三十年為文章其用心寧屬辭比事未成而不敢不引於繩墨也且三十年為文章其用心寧屬辭比事未成而不敢不引於繩墨原夫法有所必至天且弗違者乎巧者有餘拙者不足假令祭酒為文章其微辭美事一不得其所置豈揚雄劉向所稱實錄者也大宗伯又言祭酒與北地李獻吉氏接跡而起以為祭酒重則

是稿也海內學士大夫受而讀之者將益重子長之為文章而引為繩墨宗伯有力矣乃御史鄭公按陝以西諸郡稱采風使者還且奏之則又謂攀龍在左輔有祭酒于文章往往紙列國家大典而抵掌談四方疾苦九邊要害奉胡言胡奉倭言倭即欲聞時政不亦輜軒所載者哉乃若其詩則大宗伯所稱李獻吉得其具體矣吾重傷著作者之志因并錄焉攀龍得以具論二公所取祭酒者如此也

滄溟集卷二十五